

萬有文庫

第二集七百種

王雲五主編

宋詩紀事

(三)

馬日琯輯

商務印書館發行

宋詩紀事

(三)

厲鶚馬日琯輯

國學基本叢書

萬有文庫

第二集七百種

總編 葛 君

王雲五

商務印書館發行

宋詩紀事卷十一

錢唐厲鶚緝
祁門馬曰璐同緝

宋庠

庠字公序。初名郊。字伯庠。安州安陸人。徙開封之雍丘。天聖二年。舉進士第一。入翰林爲學士。歷檢校太尉平章事。樞密使。封莒國公。以司空致仕。卒。贈太尉兼侍中。諡元憲。有集。

西清詩話。二宋俱爲晏元獻門下士。兄弟雖甚貴顯。爲文必手抄寄公求雕潤。嘗見景文寄公書曰。莒公兄赴鎮圃田同遊西池。作詩云。長楊獵罷寒熊吼。太乙波閑瑞鷁飛。語意警絕。因作一聯云。白雪久殘梁複道。黃頭閑守漢樓船。仍注空字于閑之旁。批云。二字未定。更望指示。晏公書其尾曰。空優于閑。且見雖有船不御之意。又字好語健。蓋前輩務求博約情實。肫至。蓋如此也。

答葉道卿

紙尾勤勤問姓名。禁林依舊玷華纓。莫驚書錄題臣向。便是當時劉更生。

西清詩話。宋郊字伯庠。在翰林。有指其姓名傳以他說者。因請更名庠。嘗移書葉道卿清臣。目爲同年。葉戲答云。清臣宋郊榜第六人登第。徧閱小錄。無宋庠者。不知何許人。庠答詩云云。

展江亭成留題

綠鴨東陂已可憐。更因雲竇注新泉。鑿開魚鳥忘情地。展盡江湖極目天。向夕舊灘都浸月。過空新樹便留煙。使君直欲稱漁叟。願得閑州不記年。

西清詩話。許昌西湖展江亭成。宋元憲留題。有鑿開魚鳥忘情地。展盡江湖極目天之句。皆以爲曠古未有此詩。然本于五代馬殷據潭州時。時建明月園。命幕客徐仲雅賦詩云。鑿開青帝春風園。移下姮娥夜月樓。用古句摹擬。詞人類如此。但有勝與耳。否。

落花

一夜春風拂苑牆。歸來何處剩淒涼。漢皇佩冷臨江失。金谷樓危到地香。淚臉補痕煩獮髓。舞臺收影費鸞腸。南朝樂府休賡曲。桃葉桃根盡可傷。

侯鯖錄。宋呂公兄弟少。

作落花詩。爲時膾炙。

莊惠后挽詞

嬌幄柔明訓。堯闈保護賢。別居長樂寢。讓給水衡錢。謹疾方加膳。收神亟去仙。宸襟增服紀。追報煥終天。昔帝推嬪則。吾君賴母慈。陪陵漢家葬。異室閼宮祠。霧暗星軒隱。天愁月御移。翟車參享路。無復廟中期。莊獻太后挽詞

寶慈垂母訓。一紀御璫除。地有占沙舊。天仍補石餘。軒星淪夕緯。翟輅去宸居。異日金縢啓。方知復辟書。
自注。太后上仙後。於巾箱中得復辟詔書。

肝腸身無憚寒暄疾有加災生織女柰魂斷濯龍車
廡簷浮晨旭邊簫咽暝霞唯留長樂注刊美在皇家
以上合璧事類前集

季秋曉出題山光寺

旦夕人語喧汎舟北城曲十里望禪刹飄若塵外躅
是日秋宇高清輝澹晨旭林風唱殘蜩澤稗下飢鵲
野實迎露黃川蕪傲霜綠循涯得微徑捨楫步幽麓
佛寺訝靚深僧廬互重複山氣導眞想天香洗煩欲
嗟余秉微尙正壑返初服失計蹈塵躪虛名玷纓轂
安排金馬門謬草紫泥牘器偏固自傾綆短良難續
何言一麾出尙參九州牧恩深無後疵顏覲有餘慙
孔訓懲憚改義爻許頻復竭來清淨區冀脫泥塗辱
醉象或可調藩羝悔前觸萬緣自我空至道非外勗
聊謹三載期吾得事棲伏

揚州府志

宋 祁

祁字子京天聖二年與兄庠同舉進士奏名第一章獻太后以爲弟不可先兄乃擢庠第一而實祁第十時號大小宋累遷知制誥工部尙書翰林學士承旨卒諡景文有集

東軒筆錄子京博學能文章天資蘊藉好游宴以矜持自喜晚年知成都府帶唐書於本任刊修每宴罷盥漱畢開寢門垂簾燃二椽燭媵婢夾侍和墨伸紙遠近觀者皆知尙書修唐書矣望之如神仙焉多內寵後庭曳羅綺者甚衆嘗宴于錦江偶登臺命取半臂諸婢各送一枚凡十餘枚皆至子京視之茫然恐有厚薄之嫌竟不敢服忍冷而歸

九日食餠

廳館輕霜拂曙袍。糗餼花飲鬪分曹。劉郎不敢題餽字。虛負詩中一世豪。

聞見後錄。劉夢得作九日詩。欲用餽字。以五經中無之。輟不復爲。宋子京以爲不然。故子京詩云云。糗餌粉餼。餼類也。出周禮詩豪。樂天目夢得云。

玉堂作

粉署重來憶舊遊。蟠桃開盡海山秋。寧知不是神仙骨。上到鼇山更上頭。

東軒筆錄。嘉祐中。翰林諸公皆入政府。時包拯爲三司使。宋祁守鄭州。二公久著人望。而不見用。京師諺語曰。擢隊爲參政。成羣作副樞。虧他包省主閤。殺宋尙書。明年包亦爲樞密副使。而以翰林承旨召景文。景文以詩寄梁丞相。略云。梁園賦罷相如。至宣室釐磻。賈誼歸。蓋謂差除兩府。足方被召也。爲承旨又作詩云云。

清明日集西園

日日西園春思催。攜觴結客上高臺。正緣從事青州至。更許書生洛下來。早葉已成花半落。新巢未定燕千迴。芳辰物物皆堪愛。併作高陽倒載媒。時州醺既美。又命座客賦詩。故有第二聯。

中山立秋

峯雲曉影破屏顏。萬里風生結早寒。人在兜零烟外走。歲從鷓鴣口中殘。槽聲併滴添新酎。笥月兼輪掩故紈。白髮光陰誠可惜。五年搔首問長安。

八月望夜無月有感

素波涼暈淡曾城。悵悵三年此夜情。獨捲練帷成默坐。暗蟲相命作秋聲。

閏正月二十五日送客尋春集裴氏園

尋春選客共流連。雨罷春郊物物妍。黃抹柳梢初徧後。紫黏花萼未開前。朋儔自爲交驩慘。醉罷誰能辨聖賢。猶賴斜陽催跋馬。不然離恨損絲弦。

七月二十七日

客雁歸何處。寒蟬鳴不休。兼之清夜永。副以長年愁。家令有移帶。中郎餘白頭。此懷誠自感。何賴怨高秋。

十日宴江濱亭

節去歡猶在。賓來賞更延。悠揚初短日。淒緊乍寒天。霽沼元非漲。秋花自少妍。蟻留新獻酎。蕙續不殘烟。

過摩訶池

十頃隋家舊鑿池。池平樹盡但回隄。清塵滿道君知否。半是當年濁水泥。池邊不見帛闌船。麥壠連雲樹繞天。百歲興衰已如此。爭教東海不爲田。

余旣到郡有詔仍修唐書寄局中諸僚

一章通奏領州麾。詔許殘書得自隨。吾黨成章真小子。官中事了是癡兒。昏眸視久花爭亂。倦手搔餘雪半垂。所願弟兄皆傑筆。劉生當見汗青期。

司馬相如琴臺

故臺千古恨。猶對舊家山。半夜鸞凰去。他年駟馬還。死憂封禪晚。生愛茂陵閑。唯有飄飄氣。仍存天地閒。

江濱亭

一羣掀翅壓溪隅。吏事初閑此燕居。斷岸有時通略約。輕風盡日戰枰樞。雲鴻送目揮弦後。手板看山拄頰餘。芰碧蒲青來更數。江人多識使君旟。

九日藥市作

陽九協嘉神。期入始多暇。五藥會廣廈。遊肩閑相駕。靈品羅賈區。仙芬冒闔舍。擷露來山阿。斷煙去巖罅。係道雜提攜。盈簍更薦藉。乘時物無賤。投乏利能射。癰荅互作主。參薺交相假。曹植謹贗令。韓康無二價。西南歲多癘。卑溼連春夏。佳劑止刀圭。千金厚相謝。刺史主求瘼。萬室繫吾化。顧賴惡石功。捫衿重慚喏。將歸

遠假西南守。三逢梅柳新。衰令宦情薄。老惜歲華頻。郫釀工銷日。巴禽巧喚春。離家何所恨。雁後作歸人。

覽蜀宮故城作

國破江山老。人亡岸谷摧。鴛飛今日屋。鹿聚向時臺。故苑猶飛雪。荒池但劫灰。賴遺糊處壤。圖記數殘枚。恨月窺林下。悲風覓隴來。依城狐獨速。失廈鷺裴回。廢社纔存樹。陰垣自上苔。有情惟杜宇。長爲故王哀。

集海雲鴻慶院

地勝祠仍古。春餘物徧華。山雲時抱石。佛雨不萎花。嶺挾樓梯峻。巖牽殿城斜。淙谿雜環佩。怪蔓走龍蛇。供坐僧飛鉢。香園客戲沙。吾遊眞草草。深意屬青霞。以上成都文類

秋夜

西風已飄上林葉。北斗直挂建章城。人閒底事最堪恨。絡緯啼時無婦驚。老學庵筆記。

咏漢史

朱游雲小字英氣凜生風。濱死危言悟帝聰。殿檻不修旌直諫。安昌依舊漢三公。韻語陽秋。

題三泉龍洞

蚪洞聳雲峯。緣虛一棧通。雲披雙壁敞。樹補半巖空。概竹森煙蘂。飛泉曳玉虹。重蘿不肯晝。陰壑自然風。嶺斷天斜碧。崖傾日倒紅。浮江邈難遇。留恨翠微中。

能改齋漫錄。三泉龍洞。以山爲門。深數十步。復見天日。及山水之秀。蓋自然而成。非人力也。宋景文公賦詩。

蛙

越國車前矜勇甚。子陽井底太驕生。乘時不羨雲溟樂。口作儀同鼓吹聲。

蜨

撲粉曾過宋玉牆。一身生計託流芳。不須長結東風願。秋菊春蘭各有香。以上合璧事類別集。

吳中友人惠蟹

秋水江南紫蟹生。寄來千里佐吳羹。楚人欲使衷留甲。齊客何妨死願烹。下筯未休資快嚼。持螯有味散朝醒。定知不作螳螂悞。曾廁西都博士名。蟹略。

臘後晚望

寒日繫難定。鳴笳弄已休。凍崖初辨馬。昏谷自量牛。漢樹臨關密。胡泉入塞流。登高能賦未。風物古堯州。

送越州陸學士

梅天霞破候旗乾。鄉樹依然越絕間。挾策當年逢掖去。懷章此日繡衣還。亭餘內史浮觴水。路入仙人取箭山。牛酒盛誇先墅宴。不妨春詔得親班。

答勸農李淵宗嘉州江行見寄

嘉月嘉州路。軻峩按部船。山圍杜宇國。江入夜郎天。霽引溪流望。涼供水閣眠。愧君舟楫急。遂欲濟長川。

贈清逸魏處士

奕世依巖石。衰恩下帝庭。姓名高士傳。父子少微星。池溜遙通澗。家林近帶坰。分明詔書意。天極賜鴻冥。

瀛奎律髓此魏野之子
閑也亦能詩世其隱

長安道中悵然作

三輔古風煙。征驂悵未前。山園蓬顆外。自注賈山議始皇侈葬言後世不得蓬顆蔽家宮室黍離邊。樹老經唐日。碑殘刻漢年。便須眞隕涕。不待雍門弦。

寒食假中作

九門煙樹蔽春塵。小雨初晴潑火前。草色引開盤馬地。簫聲催暖賣餚天。紫絲早絮輕無著。弄袖和風細

可憐。鼇署侍臣貪出沐。珉麝珠餽愧頒宣。

擬杜子美峽中意

天入虛樓倚百層。四方遙謝此登臨。驚風借壑爲寒籟。落日容雲作暝陰。峴井北拋王粲宅。楚衣南逐女媧砧。十年不識長安道。九籥宸開紫氣深。

春宴行樂家園

園荇初乾小雨泥。飲壺游屐況親攜。身輕早蜨千回舞。技癢新禽百種啼。乘飲草茵侵坐軟。畏風桃綬向林低。陽暉自有留人意。銜照高樓未遽西。原注。芡人去聲。

把酒

歌管嘈嘈月露前。且將身世付酡然。漫誇驪鼠機頭箭。不識醯雞甕外天。青史有人譏巧宦。黃金無術治流年。君看醉趣兼醒趣。始覺靈均更可憐。

落花

墜素翻紅各自傷。青樓煙雨忍相忘。將飛更作迴風舞。已落猶成半面妝。滄海客歸珠迸淚。章臺人去骨遺香。可能無意傳雙蜨。盡付芳心與蜜房。以上瀛奎律髓。

瀛奎律髓。夏英公守安州。景文兄弟。以布衣游學。席上各賦落花詩。英公以爲有台輔器。後元憲狀元。景文甲科同榜。天下以爲二宋。

希夷峽

仙館三峯下，年華百歲中。夢休孤蝶往，蛻在一蟬空。藥笈微言祕，霄辰浩氣通。丹遺舐後鼎，林遣御餘風。布霧沈荒白，淩霞委暗紅。蛾眉有歸約，飛步與誰同。華嶽全集

寄大固山嘉祐院長吉上人上人曾遊京師得宋公以下一百四十五人所書般若經建臺以貯之

名高身愈隱，孤錫倚巖扃。園布黃金地，臺藏白馬經。庵雲吞暝燭，澗月瀉虛瓶。坐想谿橋路，莓苔又幾青。台州府志

句

色映珊瑚爛，聲迎羽月遲。

六一詩話：天聖二年，省試采侯詩，宋尙書祁最擅場。其句云云，尤爲京師傳誦。當時舉子目公爲宋采侯。

碧雲謾有三年信，明月空爲兩地愁。

優古堂詩話：雲齋廣錄云：二宋以文章齊名天下。子京守蜀日，作詩三百名曰叢藥，有句云云。後卒不入兩府，人以爲詩藏。予以子京用何遜與胡興安夜別詩，念此一筵笑，分爲兩地愁。廣錄之論，不知所自也。

蟹美持螯日，鱸香抑鮓天。芥隱筆記曉日侵簾押，春寒到被池。侯鯖錄青帝回風還習習，黃人捧日故遲遲。困學紀聞虺蔓相結盤，蚪梢久回曲。紛若未契繩，繁如已綸紉。咏藤誰言漢樸學，正似楚枝官。以上哲匠金桴

吳感

感字應之，吳郡人。天聖二年，省試第一。九年，又中書判拔萃科，仕至殿中丞。

如歸亭

五柳門南派水東。水邊亭上興無窮。半窗山色來雲外。一枕荷香帶雨中。繡被夜歌青翰檝。綠波春颺紫莖風。塵曹未竊江湖號。攜手闌干早晚同。吳江縣志

呂造

造。晉江人。言子。天聖二年進士。

刺桐城

閩海雲霞繞刺桐。往年城郭爲誰封。鷓鴣啼困悲前事。荳蔻香銷減舊容。

泉南雜記。泉州築城時。環城皆

植刺桐。故號刺桐城。呂造詩云。

胡宿

宿。字武平。常州晉陵人。天聖二年進士。歷兩浙轉運使。召修起居注。知制誥。翰林學士。拜樞密副使。罷知杭州。以太子少卿致仕。薨。贈太子太傅。諡文恭。有集。

太湖石

海岱鉛松妄得名。洞庭山腳失寒瓊。漱成一朶孤雲勢。費盡千年白浪聲。誰向機邊逢織女。直疑巖下見初平。年來賞物多成病。日遶蒼苔幾徧行。

宿秀峯寺

在靈巖山

夕鐘初斷海鯨音。投宿香園半翠岑。冰簟浸牀消客夢。水簾澄月伴僧吟。雄風拂衽清涼極。珍樹交柯翠翳深。一夜漢陰機事息。草堂虛論破煩襟。

彭山贈貫之

彭山隔重湖。落日見孤塔。揚舲入空曠。煙樹散鵝鴨。山中老臞仙。萬頃纖芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒霎霎。黎明帶星歸。尙及齋鼓踏。臨歧戒後會。梅熟新秧插。期我散縑楮。莫忘鷗盟歃。

送楊中允宰常熟

丹舸傍江潯。嘔啞遠鷗音。新科持片玉。能政引孤琴。美進宮坊秩。榮歸里閭心。名參天下雋。歌著邑中黔。地志連香徑。家園帶武林。吳山幾屏秀。楚水一篙深。晚鼓停餘疊。秋帆臥半陰。平時接方驥。後夜望橫參。陶菊何妨醉。江毫且剩吟。悠悠河上別。千里鬱朋簪。

送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩得杼山清。幾夕巖窗下。忘眠聽瀑聲。
以上吳郡志。

過桐廬

兩岸山花中有溪。山花紅白徧高低。靈源忽若乘槎到。仙洞還同採藥迷。二月辛夷猶未落。五更鴉臼最先啼。茶煙漁火遙堪畫。一片人家在水西。

塞上

漢家神箭定天山。煙火相望萬里閒。
契利請盟金七酒。將軍歸臥玉門關。
雲沈老上妖氛斷。雪照回中探騎閑。
五餌已行王道勝。絕無刁斗至闐顏。

飛將

曾從嫖姚立戰功。胡雛猶畏紫髯翁。
雕戈夜統千廬會。緹騎秋畋五柞宮。
後殿拜恩金印重。北堂開宴玉壺空。
從來敵國威名大。麾下多稱黑稍公。
以上瀛奎律髓

次韻朱沈春雨之什

蒼野迷雲黯不歸。遠風吹雨入巖扉。
石牀潤極琴絲緩。水閣寒多酒力微。
夕夢將成還滴滴。春心欲斷正霏霏。
憂花惜月長如此。爭得東陽病骨肥。

淮南王

貪鑄金錢盜寫符。何曾七國戒前車。
長生不待爐中藥。鴻寶誰收篋內書。
碧井牀空天影在。小山人去桂叢疎。
雲中雞犬無消息。麥秀漸漸徧故墟。

早夏

井轄投多思不禁。密垂珠箔晝沈沈。
睡驚燕語頻移枕。病起蛛絲半在琴。
雨徑亂花埋宿豔。月軒脩竹轉涼陰。
一春酒費知多少。探盡囊中換賦金。
以上宋藝圃集

芙蓉湖

小湖香豔戰芙蓉。碧葉田田擁釣篷。嵐氣欲飛山隔岸。秋光不定水搖空。翻翻雪鳥爭投浦。潑刺霜鱗對擲風。正是滄浪濯纓日。一竿多謝紫溪翁。咸淳毘陵志。

函谷關

天開函谷壯關中。萬古驚塵向此空。望氣竟能知老子。棄繻何不識終童。謾持白馬先生論。未抵鳴雞下客功。符命已歸如掌地。一九曾誤隗生東。河南府志。

津亭

津亭歌闋戒棠舟。五兩風來不暫留。西北浮雲連魏闕。東南初日滿秦樓。層城渺渺人傷別。芳草萋萋客倦遊。平樂舊懽收不得。更憑飛夢到瀛洲。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認嘯臺。桐井曉寒千乳斂。茗園春嫩一旗開。馳煙未勒山庭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝於京兆最知名。一區東第趨晨近。數刻西廂接晝榮。正是兩宮裁化日。百金雙壁拜虞卿。以上顧氏積書巖選。

憶廣福寺牡丹

十日春風隔翠岑。祇因繁朶自成陰。尊前可要人頽玉。樹底遙知地側金。花界三千春渺渺。銅槃十二夜